

ՀՈՎՀ. ԹՈՒՄԱՆՅԱՆԻ ԵԼՈՒՅԹՆԵՐԸ ՀԱՅՈՑ ԱԶԳԱՅԻՆ
ԽՈՐՀՐԴԻ ԵՎ ԱԼԵՔՍԱՆԴՐԱՊՈԼԻ ԱՐՏԱԿԱՐԳ
ԽՈՐՀՐԴԱԿՑՈՒԹՅԱՆ ՆԻՍՏԵՐՈՒՄ
(1918 թ. ապրիլ – հուլիս)

Հայոց ազգային խորհրդի (ՀԱԽ)¹ 1918 թ. ապրիլի 12-ի/մարտի 30-ի, հունիսի 24-ի և հուլիսի 6-ի արձանագրությունները նոր փաստեր են պարունակում Հովհ. Թումանյանի կյանքի մասին այն ծանր ժամանակաշրջանում, երբ ձևավորվում էր մեր անկախ պետությունը, և ժողովուրդը լարված պայքար էր մղում իր գոյապահպանության համար: Բրեստի հաշտության ստորագրման պահից նա հստակ գիտակցում էր, որ հեղափոխությունն արյունալի և դրամատիկ էջ էր լրացնում հարագատ ժողովրդի պատմության մեջ: Համընդհանուր այդ ճգնաժամից երկրամասը փրկելու համար հարկավոր էր խաղաղություն հաստատել. «Խաղաղություն, միայն խաղաղություն է հարկավոր հիմա բոլոր ժողովուրդներին»²: Նամանավանդ, երբ արտաքին ներխուժումը սաստկացնում էր ազգամիջյան հայ-թաթարական կոտորածը³: Միննույն միտքն է հնչել ՀԱԽ-ի, Անդրկովկասյան կոմիսարիատի և Սեյմի հայ անդամների, Կարսից, Երևանից, Ալեքսանդրապոլից ու հանրապետության շրջաններից գործուղված պատվիրակների, կուսակցությունների և զինվորական աստիճանների ներկայացուցիչների արտակարգ խորհրդակցության ժամանակ, որը գումարվել է 1918 թ. ապրիլի 19–21/6–8-ին Ալեքսանդրապոլում⁴: Ել-

¹ Արևելահայ կամ Հայոց ազգային խորհուրդը գործել է Թիֆլիս քաղաքում 1917 թ. սեպտեմբերի 16-ից (հին տոմարով) մինչև 1918 թ. հուլիսի 15-ը: Նրա առաջին կազմում ընդգրկվել է 15 հոգի՝ Լ. Աթաբեկյան, Հ. Այվազյան, Ա. Ահարոնյան, Ն. Աղբալյան, Տ. Բեկզադյան, Ա. Գյուլխանդանյան, Ա. Երզնկյան, Պ. Զաքարյան, Խ. Կարճիկյան, Կ. Ղազարյան, Ս. Մամիկոնյան, Ղ. Տեր-Ղազարյան, Հ. Տեր-Օհանյան, Ս. Հարությունյան ու Ռ. Տեր-Մինասյան: Ընդ որում, Կորյուն Ղազարյանի անունը ճիշտ չեն գրել, բայց հինգերորդ նիստից հետո վրիպումն ուղղել են [տե՛ս Հայաստանի ազգային արխիվ (այսուհետև՝ ՀԱԱ), ֆ. 222, ց. 1, գ. 141, թ. 1, 2 շրջ.]: 1918 թ. հուլիսի 19-ին ՀԱԽ-ը տեղափոխվել է Երևան ու իր աշխատանքը շարունակել որպես Հայաստանի Հանրապետության խորհրդարան: Բառի բուն իմաստով՝ այդ աստիճանը պաշտամենտ է դարձել 1919 թ. օգոստոսի 1-ից՝ համազգային ընտրություններից հետո:

² Հ ո վ հ. Թ ու մ ա ն յ ա ն. Երկերի լիակատար ծողովածու (այսուհետև՝ ԵԼԾ), հ. 7, Քննադատություն և հրապարակախոսություն 1913–1922, Երևան, 1995, էջ 352: Նախադասությունը ռուսերեն է՝ «Мир только мир нужен теперь всем народам».

³ Նույն տեղում:

⁴ Տե՛ս Ա. Ա վ ե տ ի ս յ ա ն. Հայկական հարցը 1918 թվականին, Երևան, 1997, էջ 144, Համահայկական խորհրդակցություններ (1912–1920 թթ.), Փաստաթղթերի և նյութերի ժողովածու, խմբ.՝ Ա. Վիրաբյան, Երևան, 2004, էջ 332, 336: Երրորդ փաստաթղթում հրապարակվող Հովհ. Թումանյանի ելույթի մասին տեղեկացվում է Հ. Ավետիսյանի վերը հիշատակված մենագրության 152-րդ էջում: Երկրորդ և երրորդ փաստաթղթերի

նելով մուսավաթի՝ ամբողջ երկրամասը անկախ հռչակելու թիֆլիսյան պահանջներից՝ մասնակիցները քննարկել են ստեղծված իրավիճակը, իրենց քայլերը, իշխանության գործունեությունը, Բրեստ-Լիտովսկի հաշտության և ինքնապաշտպանության խնդիրները: Նիստերի եզրափակիչ օրը Հովհ. Թումանյանը հանդես է եկել երկու ելույթով՝ ընդգծելով խաղաղության, միասնության ու հարևանների հետ բարիդրացիական հարաբերությունների կարևորությունը:

Բայց հակառակ նրա ցանկությանը, հարձակվող թուրքական բանակի հրամանատարության հետ տարվող բանակցությունները ձգձգվում էին: Հետևաբար, 1918 թ. մայիսի 19-ին ելույթ ունենալով ՀԱԽ-ի խառը նիստում, ՀԱԽ-ի անկուսակցական անդամ Ս. Մամիկոնյանը հայտարարել է Լոռու գունդը վերակազմելու անհրաժեշտության մասին: Նա դիմել է Հովհ. Թումանյանին Լոռի մեկնելու, գունդը կարգի բերելու և այն Թ. Նազարբեկյանի հրամանատարության տակ դնելու առաջարկով⁵: Հայկական զորաբանակի (կորպուսի) հրամանատարին՝ սպայակույտով հանդերձ, ծրագրում էին տեղափոխել Ղարաքիլիսա: Ս. Մամիկոնյանի առաջարկով Մեծ լոռեցուն հաստատում են Ղարաքիլիսայի պաշտպանության հարցերով ՀԱԽ-ի ընդհանուր լիագործի պաշտոնում: Նրա պատասխանատվության գոտին ընդգրկում էր Լոռին, Ղազախը, Շամշադինը, Փամբակն ու Բորչալուն: Հովհ. Թումանյանը ստանձնած պարտականությունների կատարումն ավարտել էր 1918 թ. հունիսի 27-ին, երբ հրաժարական է տվել⁶: Ըստ պաշտոնական տվյալների՝ նա ՀԱԽ-ի լիագործի պարտականություններն իրագործել է 1918 թ. մարտի 15-ից հունիսի 15-ը⁷:

Նկատենք, որ Թումանյանի պատասխանատվության տակ գտնվող վայրերում տիրում էր անկառավարելի իրավիճակ, զինվորականներն ու տեղի բնակչությունը գործում էին ինքնուրույնաբար, ու սա վերաբերում էր ինչպես ջոկատների կազմակերպման ոլորտին, այնպես էլ բնակիչներին և գաղթականներին տարատեղելու ճիգերին: Հովհ. Թումանյանը, թուրքական բանակի սրընթաց հարձակման և մայիսի 28-ին Ղարաքիլիսայում տեղի ունեցած կոտորածի ու գազանությունների կենդանի վկան է եղել⁸:

Բանաստեղծը Թիֆլիս է վերադարձել հունիսի 24-ին ու դեպքերի վերաբեր-

ձեռագրերը համեմատվել են ճշտվել են ՀԱԽ-ի գլխավոր արխիվագետ Հ. Ճաղարյանի հետ միասին:

⁵ ՀԱԽ, ֆ. 222, ց. 1, գ. 141, թ. 213 շրջ.:

⁶ Հ. Ն. Վ. Թումանյանի և Ն. Ե. Լ. Ե. 10, Նամակներ 1905–1922, Երևան, 1999, էջ 288, 644, տե՛ս նաև ՀԱԽ, ֆ. 222, ց. 1, գ. 123, թ. 30:

⁷ Լ. Ս. Գարապետյանի. Հովհաննես Թումանյանի հասարակական գործունեությունը: (Դրվագներ), Երևան, 1992, էջ 211–212, 215: Տե՛ս նաև Թումանյանը և հայոց պատմական ճակատագիրը, կազմ. Լ. Հ. Հախվերդյան, խմբ. Լ. Ս. Բարսեղյան, Երևան, 2000, էջ 24, 216, 271, Հ. Այվազյանի. Ջորավար Անդրանիկ և Հովհաննես Թումանյան, Երևան, 2004, էջ 162, Ս. Հ. Ն. Վ. Թումանյանը և հայ գրողների կովկասյան ընկերությունը, Երևան, 2007, էջ 126, 307:

⁸ Նման անմիջական վկայություն կա պորուչիկ Ալեքսեյ Կոլմակովի 1919 թ. փետրվար-ապրիլին հրատարակած հոդվածաշարում [տե՛ս Поручик Алексей Колмаков. «Историческая армянская рота (составил и подготовил к изданию А. Закарян). Ереван, 2009, с. 29–31].

յալ զեկուցում ներկայացրել Հայոց ազգային խորհրդում: Մի շարք հարցերի քննարկմանը զուգահեռ՝ նա անդրադարձել է մի կարևոր հանգամանքի՝ Ղարաքիլիսայի վճռորոշ մարտերում մտերիմ ընկերոջ՝ Ա. Օզանյանի⁹ բացակայությանը: Որոշ ժամանակ անց՝ հուլիսի 21-ին, նա թվել է նաև այլ կարևոր հանգամանքներ. Ղարաքիլիսան թուրքերի հարձակման երկրորդ հիմնական ուղղությունն էր, ու նրա արգելքը հաղթահարելու դեպքում հնարավոր էր գրոհել Թիֆլիսի վրա: Հատկապես այդ կարևոր թևն ու ամենից շատ՝ երկաթուղին, վստահել են արևմտահայ դիվիզիայի մարտիկներին¹⁰: Արխիվային փաստաթղթերը վկայում են, որ այդ գործառնան անգործ ու պարապ չի մնացել: 1918 թ. մայիսի 21-ին, օրինակ, հայկական զորաբանակի սպայակույտի պետ գեներալ-մայոր Ե. Վիշինսկին Ազգային խորհրդին է փոխանցել Անդրանիկի հեռագիրը: Այն պարունակում էր արևմտահայ զինուժի՝ մայիսի 13-ից 18-ը ծավալած ակտիվ մարտերի մասին հաշվետվություն¹¹: Այնուհետև՝ մայիսի 25-ին, ՀԱԽ-ը նոր զեկուցագիր է ստացել, թե թուրքական ռազմական ուժերը պատրաստվում են գրոհել Ջալալօղլու վրա, և Ա. Օզանյանն առաջարկում է մարտի մեջ մտնել¹²: Մակայն զորաբանակի հրամանատար Թ. Նազարբեկյանն իր գորքերին դեպի Դիլիջան նահանջելու հրաման է արձակել, որն արվել է Ազգային խորհրդի մայիսի 21-ի կարգադրությամբ: Ըստ այդմ՝ պահանջվում է անհապաղ բանակցություններ սկսել օսմանցիների հետ՝ ապահովելով հակառակորդի ազատ տեղաշարժը մինչև Ջուլֆա¹³:

Ողբերգական այդ օրերին Անդրանիկին հասցեագրած Հովհ. Թումանյանի քննադատությունը բացառիկ երևույթ չի եղել, դրան հավելվել է բանաստեղծի՝ 1918 թ. հունիսի 28-ին Ազգային խորհրդին և Անդրկովկասյան կոմիսարիատին տված հավասարապես տհաճ գնահատականները: Ատյաններ, «որոնց ապիկարությունը հասնում է[ր] ոճրագործության»¹⁴:

Հրապարակվող չորրորդ փաստաթղթում Հովհ. Թումանյանն իր ելույթում հիշատակել է նաև թուրքական սպայակույտին, որը հաստատվել էր Լոռվա խորքում՝ Ջորազետում: Դրանից հաշված օրեր անց, Խորհրդի անդամներին ներկայացվել է Մ. Պապաջանյանի հունիսի 21-ի թվակիր նամակը՝ Վեհիբ փաշայի հետ ունեցած հանդիպման մասին¹⁵: Փաշան հրաժարվում էր օսմանյան գորքերը Հայաստանի սահմաններից դուրս հանել, ինչը հիմնավորում էր վրաց-գերմանական հարձակման վտանգով: Նա նաև Բաթում էր հրավիրում Հայաստանի Հանրապետության ներկայացուցիչներին, որպեսզի քննարկեն գաղթականների խնդիրը: Փաշան խոստացել է երեք ավտոմեքենա տրամադրել ուղևորության համար, հեռագրալար Բաթումում՝

⁹ Թումանյանը և հայոց պատմական ճակատագիրը, էջ 219, Հ. Այվազյան. նշվ. աշխ., էջ 128:

¹⁰ Հովհ. Թումանյան. ԵԼԺ, հ. 7, էջ 355:

¹¹ ՀԱԱ, ֆ. 200, գ. 1, գ. 21, թ. 69:

¹² Նույն տեղում, թ. 76:

¹³ Նույն տեղում, թ. 73-74, Ա. Հ. Հարությունյան. Թուրքական ինտերվենցիան Անդրկովկաս 1918 թ. և ինքնապաշտպանական կռիվները, Երևան, 1984, էջ 190, 192-193:

¹⁴ Հովհ. Թումանյան. ԵԼԺ, հ. 10, էջ 287:

¹⁵ ՀԱԱ, ֆ. 222, գ. 1, գ. 141, թ. 273 շրջ.:

շաբաթը մեկ-երկու ծածկագիր նամակ ուղարկելու, և նույնիսկ վարկ տրամադրել հայերի համաձայնության ու ռազմական սերտ համագործակցություն հաստատելու դեպքում: Հասկանալով, որ Բաթումի հաշտությունից թուրքերի հրաժարման վտանգն իրական է, հայկական պատվիրակությունը (Ս. Հարությունյանի, Հովհ. Թումանյանի, մարտի 30-ից ապրիլի 2-ը Բաքվի հաջողված հայկական ինքնապաշտպանության շտաբի երկու պետերից մեկի՝ գեներալ Ի. Ս. Բադրամովի կազմով ու թարգմանիչ Միրզոյանի մասնակցությամբ) մեկնել է Բաթում՝ Վեհիբին փոխարինած Էսադ փաշայի հետ բանակցելու համար: Վերջինս Ղարաքիլիսան գրաված դիվիզիայի հրամանատարն էր, ով զինվորներին պաշտոնապես թույլ էր տվել բազմօրյա սանձարձակություն ու կոտորած սարքել քաղաքում ու Համամլո¹⁶ և Նալբանդ, Ավդիլբեկ¹⁷, Վարդանլի¹⁸, Ղշլաղ¹⁹, Բզովդալ²⁰, Եղաբլու²¹, Մարմուսախլի²², Դարպաս²³ գյուղերում²⁴: Փաշային ասվում է, թե հարկավոր է թույլատրել գաղթականների տունդարձը, և որ թուրքական բանակը պետք է հեռանա փոքրիկ Հայաստանի Հանրապետության սահմաններից: Հովհ. Թումանյանը խոսում է այն բռնությունների մասին, որոնց ինքը ականատես է եղել Լոռվա շրջանում: Թուրք փաշան իր հերթին ասել է, թե ասկյարները խախտում են Բաթումի պայմանագիրը, քանի որ ձգտում են կանխել վրաց-գերմանական առաջխաղացումը: Հայերն էլ պետք է ազդեցություն գործեն Անդրանիկի և Բաքվի խորհրդի վրա ու հորդորեն նրանց հրաժարվել դիմադրելու բոլոր քայլերից: Ընդհանուր փոխհամաձայնության բացակայության պայմաններում բանակցություններն ապարդյուն անցան:

Փաստաթղթերը հրապարակվում են մասնակիորեն՝ կենտրոնանալով Հովհ. Թումանյանի ելույթների վրա: Կատարվել են կետադրական և ուղղագրական որոշ շտկումներ:

ԳԱՅԱՆԵ ՄԱԽՄՈՒՐՅԱՆ

№ 1

¹⁶ Այժմ՝ Սպիտակ:

¹⁷ Այժմ՝ Ծաղկաբեր:

¹⁸ Այժմ՝ Խնձորուտ:

¹⁹ Ալեքսանդրապոլի գավառում:

²⁰ Այժմ՝ Բազում գյուղը Վանաձորից 5 կմ հյուսիս-արևմուտք՝ Ստեփանավան տանող ճանապարհի վրա: 1918-ին ուներ մոտ 500 տուն:

²¹ Մեր օրերում Մեղրուտ գյուղն է Գուգարքում:

²² Այժմ՝ Քարաբերդ, Վանաձորից 3 կմ հյուսիս-արևելք: 1918-ին ուներ 700 տուն, բնակիչները զբաղվում էին այգեգործությամբ ու անասնապահությամբ:

²³ 400 տուն ունեցող գյուղ Փամբակի աջ ափին: Այժմ՝ Վանաձոր քաղաքի մասը:

²⁴ Ս է պ ու հ. Էջեր իմ հուշերեն, հ. Ա, Պոսթրն, 1925, էջ 66, Ս. Ղ ա գ ա թ յ ա ն. Ղարաքիլիսայի հերոսամարտը (Ականատեսի հիշողություններից), Երևան, 2009, էջ 21, 23-24, Ս. Ա. Ֆ ա ն ա ս յ ա ն. Սարդարապատի հաղթանակը (Հայաստան, մայիս 1918), Երևան, 1991, էջ 65, Հ. Ա վ ե տ ի ս յ ա ն. նշվ. աշխ., էջ 233, Հ. Ա յ վ ա գ յ ա ն. նշվ. աշխ., էջ 175:

ՀԱՅՈՑ ԱԶԳԱՅԻՆ ԽՈՐՀՐԴԻ ՆԻՍՏԻ ԱՐՁԱՆԱԳՐՈՒԹՅՈՒՆ

Թիֆլիս, մարտի 30/ապրիլի 12, 1918 թ., 11:30, նիստ 2Ե (85)

Տեղի ունեցավ Ազգային Խորհրդի խառն նիստը Սեյմի և կառավարության հայ անդամների ու գավառի ներկայացուցիչներից: Ներկա են՝ նախագահ Ա. Ահարոնյան, Տ. Բեկզադյան, Ս. Հարությունյան, Ս. Պապաջանյան, Ա. Բաբայան, Լ. Թումանյան, Ա. Ստամբոլցյան, Կ. Արեյան, Հ. Քոչարյան: Հայ ժողովրդական կուսակցության կողմից՝ Բ. Ամիրջյան, Բ. Հարությունյան, Կ. Ստեփանյան, Ս. Մալխասյան, Հ. Առաքելյան, Հ. Այվազյան, Հ. Սպենդիարյան²⁵, Մխիթար եպիսկոպոս, Գևորգ վարդապետ [Չորեքյան]²⁶: Մոցիալիստ-դեմոկրատ կուսակցությունից՝ Ա. Չոբաբյան, Ա. Երզնկյան, Ս. Ղարաբեկյան, Հ. Բեկզադյան, Ա. Փիրումյան: ՀՀԴ կողմից՝ Վ. Տեր-Գևորգյան, Ս. Հարությունյան, Հ. Չոլախյան, Հ. Յաղոջյան, Կ. Ղազարյան, Բ. Թոփչյան, Հ. Չավրյան, Հով[հաննես] Թումանյան, գավառից՝ [Արամ] Մանուկյան, Ս. Թորոսյան, Վ. Նավասարդյան, Ն. Աղբալյան:

Ա. Ահարոնյան նիստը բանալով, հաղորդում է հաշտության բանակցությունների մասին մի քանի տեղեկություններ: Թուրքիան ներկայացրել է ուլտիմատում, պահանջելով 48 ժամվա ընթացքում պատասխանել՝ թե ընդունում են Բրեստ-Լիտովսկի պայմանագիրը, թե ոչ: Եթե վրացիներն ընդունեն, մենք ինչ դիրք ենք բռնելու, շարունակելու՝ ենք պատերազմը, թե ոչ:

Ս. Պապաջանյան. Առանց վրացիների մենք մենակ չենք կարող պատերազմել: Պետք է ընդունել Բրեստ-Լիտովսկու պայմանագիրը, որը, իհարկե, մեր հարցի լուծումը չէ, բայց հնարավորություն կտա փոքր-ինչ շունչ առնելու և ավելի կազմակերպված դիմագրավելու հնարավոր բարդությունների դեմ:

Հովհ. Թումանյան. Ի նկատի առնելով, որ հաց, գորք, գենք, տրամադրություն և կազմակերպչական շնորհք չկա, առաջարկում է հաշտվել, մանավանդ դրսից որևէ օգնության հույս չկա: Պետք է կենդանի ուժը փրկել: Ժողովրդին բնաջնջումից փրկել, ինչ գնով էլ լինի:

Ա. Բաբայան. Նկարագրում է ֆրոնտի դրությունը, որին ինքը ակնաստես է եղել վերջին օրերում: Չորքի տրամադրությունը փոխվել է դեպի լավը. հին դիսցիպլինան մտցված է առանց տրտունջի, Մարիդամիշի նահանջը եղել է նախամտածված ձևով և չի կարելի նկատել իբրև պարտություն:

Ս. Հարությունյան. Առաջարկում է ամեն մի ֆրակցիայի իր կարծիքը հայտնելու:

Ս. Փիրումյան. Պաշտպանությունը մեկ է և ընդհանուր, չպետք է անվստահություն լինի դեպի այս կամ այն տարրերը, որ վտանգավոր է գործի համար: Պետք է ընդգրկել ընդհանուր տեսակետ և չմեղադրել վրացուն կամ հային:

Տ. Բեկզադյան. Կարիք չկա մեղավորներ փնտրելու: Թեև Հայաստանը մտնում էր վրացական ֆրոնտում և նրան չպաշտպանեցին, բայց մենք մեղադրական ճանապարհով չենք գնացել, ընդհակառակը միշտ ընթացել ենք վրա-

²⁵ Գաղթականական խորհրդից. տե՛ս ՀԱԱ, ֆ. 222, ց. 1, գ. 141, թ. 276 շրջ.:

²⁶ 1916 թվականից գաղթականների Եղբայրական օգնության կոմիտեի նախագահ, 1945-ից՝ Գևորգ Զ կայտողիկոս: Արձանագրության մեջ վավերացվել է որպես Չարքյան:

ցիների հետ միասին: Բայց եթե վրացիները չուզենան մեզ հետ միանալ, մենք մենակ ենք կռվելու, որովհետև ուրիշ ելք չկա:

Ա. Ջոհրաբյան. Հարցը պարզ դնել. ամենավատթար դեպքում էլ կռիվը շարունակում ենք, թե ոչ: Ինչ գարանտիա կա, որ թուրքերը Կարսը գրավելով առաջ չեն գա, այդ գարանտիան չկա: Իսկ նրանց առաջխաղացումը ժողովրդի բնաջնջում է նշանակում: Ուրեմն պետք է որոշել կռվելով ենք մեռնում, թե առանց կռվի: Իհարկե լավագույն ելքը կռվի ճանապարհ է, որի համար պետք է տրամադրությունը բարձրացնել, ստեղծելով սերտ կապ վրացական և հայկական խմբի միջև:

Ա. Մանուկյան. ՀՀԴ պաշտոնապես հայտարարել է, որ մենք Ա. Չխենկելիի հետ համաձայն չենք, և նրա տեսակետը եթե ընդունվի, դուրս կգանք կառավարությունից: Տրոնտի և թիկունքի տրամադրությունը բարձր է. Թիֆլիսումն է տիրում լքումն: Ուլքեր ծանոթ են թուրքերի քաղաքականության, Արդահանի մանրամասություններին, նրանք չեն կարող տարբեր կարծիք ունենալ: Թուրքիան ոչ մեր պայմաններին կնայի և ոչ մեր վստահացումներին. զանազան պատրվակներով նա շարունակ միջամտել է մեր գործերին: ՀՀԴ զավառական ընկերների կողմից հայտնում է, որ պետք է կռիվը շարունակել Կարսի և Բաթումի համար:

Ա. Փիրումյան. Այս խնդիրը քաղաքական և ոչ գործնական քայլ է և ուրեմն պետք է լուծել քաղաքականորեն, առանց ի նկատի առնելով հնարավորությունները: Այս կռիվը հեղափոխության կռիվ է ընդդեմ ռեակցիայի, իսկ ռեակցիան գոյություն ունի մեզանում ոչ միայն թուրքերի, այլև վրացական որոշ տարրերի մեջ, օրինակ շատ վրացի սպաների մասնակցությունը թուրքական գործերի մեջ ընդդեմ բոլշևիկների:

Ա. Ջաֆարով²⁷ պարզ ասել է. եթե Բաքուն չհանձնվի իրենց, կկանչեն օսմանցիներին: Պարզ է ուրեմն, որ ռեակցիոն տարրերը օսմանցիների միջոցով ուզում են իրենց դասակարգային դիրքերը ամրացնել: Եվ եթե ռեակցիոն ուժը լիներ Ռուսաստանում, նրանք այնտեղ կդիմեին: Եվ սա շատ բնական է: Հետևապես հեղափոխական դեմոկրատիան դեպի օսմանյան տիրապետությունը այլ վերաբերմունք չի կարող ունենալ, քան կռիվը ընդդեմ ռեակցիոն տիրապետության: Առաջ փոքր հույս կար թե Անդրկովկասի անկախությունը փրկություն չէ, փրկությունը պատերազմն է, որի համար պետք է դաշնակցել բոլշևիկական Ռուսաստանի հետ, ոչ թե բոլշևիզմը բերել այստեղ, այլ օգտվել նրա նյութական, ռազմական աջակցությունից: Այսպես ուրեմն չպետք է ընդունել Բրեստ-Լիտովսկու պայմանագիրը և կռիվը շարունակել:

Ա. Խաչատրյան. Խնդիրը պարզ է, խոսելը հուսահատեցնում է, Թուրքիան ոչ մի պայմանով չի կանգնի և առաջ է շարժվելու անզամ առանց պատրվակի: Այնպես որ ուրիշ ելք չկա, թեկուզ մնանք մենակ, պետք է կռվենք, հարկավոր է լարել ուժերը, ոգի ստեղծել:

Ա. Ջոհրաբյան. Թուրքերի պահանջը՝ անկախություն հայտարարել, մի միջոց է մեզ Ռուսաստանից անջատելու և մենակ թողնելու: Թեև Թուրքիան խոստացել է միջազգային գրավական, բայց նրան չի կարելի հավատալ: Թուրքերը գալու են, իսկ եթե մնան, իրենց ներկայությամբ վատթար դրություն կստեղծ-

²⁷ Անդրկովկասյան կոմիսարիատի առևտրի և արդյունաբերության կոմիսար:

ծեն: Անմիջական ռեակցիոն տարրերը գլուխ են բարձրացրել: Դադասանում հազավաթ է հայտարարված, Բաքվում մուսավաթն է կովում: Թուրքիան հանդիսանալու է պատվար այդ ռեակցիայի, որի դեմ պետք է կովել: Մենք կարող ենք չհաղթել, բայց ուրիշ էլք չկա: Ժողովրդին պարզ ասել. որքան լավ դիմադրի, այնքան քիչ ցավ կտա: Բրեստ-Լիտովսկու պայմանագիրը ընդունելի չէ ոչ միայն ազգային, այլ ընդհանուր դեմոկրատական տեսակետից: Մեյմը նույնպես չի ընդունի և հավանորեն մուսավաթը դուրս կգա կամ չեզոք կմնա լավագույն դեպքում: Այդ դեպքում գումմեթի²⁸ կոչը կարող է ազդեցություն ունենալ:

Ա. Երզնկյան. Թուրքերը ոչ մի պայմանով չեն կանգնի, գլխավորապես այն կոտորածային քաղաքականության, որ եղել է Երևանի և Ալեքսանդրապոլի շրջանում, ուստի անխուսափելի է դառնում կոիվը: Ինքը սկզբում այլ կարծիք ուներ, բայց մոտիկից ծանոթանալով ֆրոնտի դրությանը, կարելի է որոշ հույս ունենալ: Չորքը կովում է հերոսաբար և հրամանատարները հույս ունեն Կարսը պահելու: Ճիշտ է, դրամական և ռազմական միջոցները քիչ են, բայց պետք է ամեն միջոց գործ դնել դրամ ստանալու հարուստներից և ռազմավթերը ժողովրդից: Հարուստների վրա դնել պարտադիր խոշոր տուրք, ամեն մի ընտանիքից պահանջելով մի հրացան իր փամփուշտներով: Այս կերպ հնար կլինի պաշտպանության գործը կազմակերպելու: Ֆրոնտի դրությունը հուսահատական չէ, պետք է տրամադրություն ստեղծել: Պետք է բոլորը գնան ֆրոնտ, տեսնեն բոլորը, ապա թե վճիռ կայացնեն, որովհետև Թիֆլիսում նստածները պանիկայի մեջ են:

Ս. Հարությունյան. Երկու խոշոր կուսակցություններ պատերազմի կողմնակից են, ուրեմն Մեյմն էլ որոշելու է պատերազմել: Ա. Երզնկյանի կարծիքը արդյունք է լոկ տրամադրության, իսկ իրողությունը շատ անմխիթար է: Եթե Երևանի, Ախալքալաքի, Ղարաքլիսայի էքսցեսները շարունակվեն, իհարկե, Թուրքիան առաջ կգա միջամտելու: Մեր զորքերի տրամադրությունը երբեք ուն է, օրինակ մի շրջանի 3.000-ից 24 են միայն ֆրոնտ գնացել: Պարեն չունինք, այլուր չկա, հրացան, փամփուշտ նույնպես, և ժողովուրդն էլ հազիվ բան տա: Դրամ չկա, որտեղից պետք է ճարել: Իսկ տրամադրության մասին ավելորդ է խոսելը, որովհետև ժողովուրդը հոգնած է և կովելու ոչ մի տրամադրություն չունի և ահագին քանակությամբ դասալիքներ է տալիս: Դրությունը ծանր է և պետք է հաշտություն կնքել: Այս կերպ միաժամանակ կարելի է կանգնեցնել թուրքերի առաջխաղացումը: Ինչը²⁹ կնպաստի մեր ուժերի կազմակերպմանը: Պետք է կենդանի ուժը պահել այն դեպքերի համար, երբ թուրքերի կողմից որևէ խախտում լինի դաշնագրի մեջ, իսկ եթե կովենք՝ այդ ուժն էլ կորցնելու ենք:

Ն. Աղբալյան. Օրինակ բերելով թուրքերի տմարդ վարմունքը Արդահանում, Ղարաուրդանում և Ղարադուրտում՝ գտնում է, որ հայերին նույն վիճակն է սպասում, եթե ընդունենք նրանց պայմանները: Նախ զինաթափ կանեն, հետո կկոտորեն: Այդպես է եղել, այդպես էլ կլինի: Ովքեր ասում են, թե միջոցներ չկան, սխալվում են. հաց որքան ուզեք կա Կարսի, Ալեքսանդրապո-

²⁸ Գումմեթ – Ադրբեջանում գործող սոցիալիստական ուղղվածությամբ կուսակցություն:

²⁹ Փաստաթղթում՝ իսկ:

լի շրջանում, որ լիուլի բավական է մեր գործի մի քանի ամիս առնվազն: Թնդանոթի հրանյութ այնքան կա, որ ամեն թնդանոթին հասնում է 14.000 ռուսք: Լիբելի փամփուշտը մոտ 40 միլիոն է հասնում, որ հարկավոր դեպքում կարելի է փոխել, իսկ մոսինի փամփուշտը թեև համեմատաբար քիչ է, բայց առայժմ բավարար կլինի, մինչև կկարողանանք գործարան պատրաստել: Ամեն բան կա, պետք է միայն տրամադրություն և վճարականություն ունենալ: Չպետք է մոռանալ, որ թուրքերի դրությունը մեր համեմատությամբ շատ էլ նպաստավոր չէ: Նրանց թիկունքը շատ ավելի վատ է, քան մերը. գյուղերը քանդված, ճանապարհները ավերված, այնպես որ նրանց շարժողությունը չի կարող առաջությամբ կատարվել: Այս բոլորը մեզ թելադրում է չհուսահատել և կովել, մանավանդ որ ուրիշ էլք չկա:

Վ. Նավասարդյան. Բոլոր ճանապարհները փակված են մեզ համար, մեզ մնացել է միայն մեռնելու իրավունքը: Օգտագործենք այդ իրավունքը ամենալայն չափով: Եվրոպական պետությունների երաշխիքը չկա, իսկ Թուրքիան ոչ մի երաշխիք չի տալիս: Չորքը այժմ սթափված է և հերոսաբար կոպում է, պետք է միայն թիկունք մաքրել, խիստ միջոցներ գործադրելով ինտ[ե]լիգենտների, բժիշկների և սպաների նկատմամբ, որոնք զանազան պատրվակներով խուսափում են ֆրոնտ գնալու:

Շ. Թումանյան. Եթե ուրիշ էլք չկա այս դրությունից դուրս գալու և Թուրքիան էլ առաջ է գալու, իհարկե, այլևս խոսք չի կարող լինել հաշտության մասին և պետք է կոխվր շարունակել, ինչքան էլ ծանր ու դժվար լինի մեզ համար: Միայն պետք է ամեն միջոց գործ դնել թույլ չտալու էքսցեսներ խաղաղ թուրք ազգաբնակչության նկատմամբ:

Մ. Ղարաբեկյան. Ընդունում է, որ այս կոխվր հեղափոխության կոխվ է ռեակցիայի դեմ, և պետք է այդ կոխվր ուղղել հայկական ռեակցիայի դեմ...

Բ. Ամիրջյան. Հաշտությունը համարվում է մի ժամանակավոր դադար, մի էտապ կովի մեջ, և եթե այդպես, պետք է միատարր կառավարություն լինի առանց մուսավաթիստների. հայերից, վրացիներից, ռուսներից և թուրքերի մի մասից, որի էական գծերից մեկը պիտի լինի Բաքվի փրկությունը:

Ա. Բարխուդարյան. Պատերազմի խնդիրը լուծելու են գեներալները, իսկ հաշտությունը պատվիրակները: Հավատում է Գերմանիայի երաշխիքին, որովհետև նա թույլ չի տա Թուրքիային համամուսուլմանական պետություն կազմելու:

Ա. Ահարոնյան. Թուրքերը անպայման գալու են, իսկ պատրվակ միշտ կարող են ստեղծել: Նրանց նպատակն է հայկական տարրը ոչնչացնել Կովկասից... Նրանց ծրագիրը պարզ է. հավատալ նրանց վստահացումներին անկարելի է, և ուրեմն մեզ մնում է միայն կովի ճանապարհը, իհարկե, վրացիների հետ միասին:

Վիճաբանությունները ընդհատվում են: Ժողովի ցանկությամբ գործնական առաջարկներ չեն արվում, միայն հանձնարարվում է Սեյմի անդամներին վճիռ կայացնելիս ի նկատի առնեն այս տրամադրությունները և գործնական քայլեր անեն այս սահմանում:

№ 2

ԱԼԵՔՍԱՆԴՐԱՊՈԼԻ ԱՐՏԱԿԱՐԳ ԽՈՐՀՐԴԱԿՑՈՒԹՅԱՆ
ՆԻՍՏԻ ԱՐՁԱՆԱԳՐՈՒԹՅՈՒՆԵՑ

Թիֆլիս, ապրիլի 8/21, 1918 թ., 10:15, նիստ Դ (4)

Նախագահությամբ Ա. Ահարոնյանի, քարտուղար՝ Ա. Աբեղյան: Օրակարգի խնդիրներ են՝ 1) իշխանության խնդիր, 2) ինքնապաշտպանության խնդիր: Խոսել են՝ Ն. Աղբալյան, Ա. Երզնկյան, Հ. Բեկզադյան, Ս. Վրացյան, Գ. Ղազարյան, Ա. Ջոհրաբյան, Վ. Նավասարդյան, Ա. Շահխաթունի, Ս. Մամիկոնյան, Ա. Ստամբոլցյան, Հ. Թումանյան, Ա. Խոնդկարյան, Բ. Ղարիբջանյան, Լ. Թումանյան, Հ. Քաջազնունի, Ս. Բունիաթյան, Ս. Հարությունյան, Պ. Չաքարյան, Լեո, Մ. Պապաջանյան:

... Հ. Թումանյան. Կովկասի ո՛չ մի ժողովրդի համար այնչափ անհրաժեշտ չէ նոր ընտրական իշխանություն, կենտրոնը, որչափ մեզ համար: Անջատում Անդրկովկասի մասերի կնշանակե կոիվ առանձին մասերի դեմ, կոիվ ոչ միայն Տաճկաստանի, այլև Ադրբեջանի և Վրաստանի դեմ, թույլ չպիտի տալ առանձին կառավարություններ ստեղծելը: Առանձին կառավարություն կնշանակե առանձին թշնամի: Բարեկամություն պիտի ստեղծել հարևանների հետ: Ժամանակն է խոստովանել, որ պարտված ենք մենք, մեր իտեալները՝ ջախջախված...

ՀԱԱ, ֆ. 222, ց. 1, գ. 123, թ. 15–20, 25:

№ 3

ԱԼԵՔՍԱՆԴՐԱՊՈԼԻ ԱՐՏԱԿԱՐԳ ԽՈՐՀՐԴԱԿՑՈՒԹՅԱՆ
ՆԻՍՏԻ ԱՐՁԱՆԱԳՐՈՒԹՅՈՒՆԵՑ

Թիֆլիս, ապրիլի 8/21, 1918 թ., 18:30–20:30, նիստ Ե (5)

Նախագահությամբ Ա. Ահարոնյանի, քարտուղար՝ Ա. Ստամբոլցյան: Խոսել են՝ Հ. Քաջազնունի, Հ. Չավրյան, Մ. Պապաջանյան, Գ. Խատիսյան, Ա. Երզնկյան, Ա. Ղազարյան, Ա. Շարաֆյան, Վ. Նավասարդյան, Ա. Խատիսյան, Վ. Փափազյան, Գ. Ղազարյան, Հ. Տերտերյան, Լ. Սարգսյան, Հ. Թումանյան, Ս. Մամիկոնյան:

... Հ. Թումանյան. Առաջարկում է ստեղծել մի կամք և հեղինակություն, իսկ մեզանում երկու իշխանություն կա. Ազգային Խորհուրդ և ՀՀ Դաշնակցություն, այս հանգամանքը քայքայիչ ազդեցություն է ունենում մեր գործի վրա, ապացույց թուրք-հայկական ընդհարումները, որի հանդեպ Ազգային Խորհրդի լիազորները խաղաղարար ընթացք են բռնում, իսկ խմբերը ընդհակառակը: Պետք է վերջ տալ այս բոլորին, որովհետև հետևանքները շատ վատ կլինեն...

ՀԱԱ, ֆ. 222, ց. 1, գ. 123, թ. 21–23, 25:

ՀԱՅՈՑ ԱԶԳԱՅԻՆ ԽՈՐՀՐԴԻ ՆԻՍՏԻ ԱՐՁԱՆԱԳՐՈՒԹՅՈՒՆ

Թիֆլիս, հունիսի 24, 1918 թ., 21:00–00:30, նիստ ՃԼ (130)

Ներկա են նախագահ Ա. Ահարոնյան, Ս. Տիգրանյան, Ս. Ղարաբեկյան, Հ. Դավթյան, Ռ. Տեր-Մինասյան, Ա. Բաբայան, Ն. Աղբալյան, Հ. Քաջազունի, Խ. Կարճիկյան, Ա. Ստամբոլցյան, Ս. Մամիկոնյան, Լ. Թումանյան, Ա. Երզնկյան, Հ. Թումանյան, որ նոր է եկել Լոռուց...

III. Հովհաննես Թումանյանի գեկուցումը Լոռվա մասին:

Տաճիկներն արդեն բռնել են Դվալի գագաթները³⁰, Ջալալօղլին³¹, Քոլագերանը³², Դսեղը դեպի Համգաշխան³³: Փաշան³⁴ նստում է Չորագետում³⁵: Նախքան գերմանացիների գալը, կարծես ուզում էին գնալ, ժողովրդին պատվիրեցին դուրս չգալ, բայց երբ գերմանացիներն երևացին, նրանք նորից հետ դարձան, լավ դիրքեր բռնեցին և ակոսներ շինեցին: Եվ այժմ ամուր նստած են և բնավ մտադրություն չունեն կարծես հեռանալու Լոռուց: Գերմանացիք էլ կարծես զգում են, որ նրանց այդտեղից քշելը դժվար է, թեև տաճիկների թիվը հասնում է 1.500–2.000 հոգու: Այժմ ժողովուրդը տնքում է տաճկական տիրապետության տակ: Սոսկալի կերպով թալանում են և հարվածում մանավանդ այն գյուղերը, որոնք դեպի թուրքերն ու գերիները վատ վերաբերմունք են ցույց տվել: Եղել են նաև բռնաբարումներ: Բնքը մի շրջաբերական է գրել ժողովրդին, որ կանոնավոր գործի դեմ թշնամական քայլեր չանեն, սակայն ժողովուրդը այն դրության մեջ է, որ կարող է էլ չհամբերել և ինքնագլուխ քայլեր անել, եթե որևէ միջամտություն չլինի:

Այնուհետև նկարագրում է Անդրանիկի կատարած գործերը ու վերաբերմունքը Ղարաքիլիսեի կռիվներում: Եթե նա ժամանակին Դվալի գագաթը բռներ, թերևս Ղարաքիլիսեի կռիվը այդ վախճանը չունենար: Ապա հաղորդում է իր տպավորությունները հայ ժողովրդի և գաղթականների մասին. [որ նույնիսկ սպանում են] նահանջող հայ զինվորին... [Գաղթականները] ամեն մեկը 3–4 հրացան ունի, բայց փախչում է, փոխանակ կովերու... Գողացան ոչ միայն օձիքներս, որ իրանց բնավ հարկավոր չէր, այլև գերմանացիների զինվորի հրացանը, որ էս բոսնիս նրա փրկիչն է այնտեղ: Նույնը պետք է ասել հայ զինվորի մասին... Մոլոկանները և մանավանդ հույները [նույնպես] շատ վատ դեր կատարեցին Լոռվա շրջանում...

³⁰ Դվալ – Բագումթառ, Բզովդալ՝ գտնվում է Բագումի լեռնաշղթայում, բարձրությունը՝ 2800 մետր:

³¹ Այժմ՝ Ստեփանավան:

³² Այժմ՝ Չորագետ (ավան Լոռու մարզում):

³³ Լեռնանցք ու գյուղ Գուգարքի շրջանում, այժմ՝ Մարգահովիտ:

³⁴ Խոսքը Վեհիբի եղբոր՝ մայիսի 28-ին Ղարաքիլիսան գրաված դիվիզիայի հրամանատար Էսադ փաշայի մասին է (տե՛ս Ս. Ա. Ֆ. ա ն ա ս յ ա ն. նշվ. աշխ., էջ 33, 63–64):

³⁵ Փավառ Գուգարք աշխարհում ու գետ, որը խառնվում է Փամբակի հետ, կազմում Դեբեդը: Չորագետի հոսանքը Լոռու սարահարթում առաջացրել է խոր ձոր:

ՀԱԱ, ֆ. 222, ց. 1, գ. 141, թ. 263-266 շրջ.:

ՀԱՅՈՑ ԱԶԳԱՅԻՆ ԽՈՐՀՐԴԻ ՆԻՍՏԻ ԱՐՁԱՆԱԳՐՈՒԹՅՈՒՆ

Թիֆլիս, հուլիսի 6, 1918 թ., 21:00–00:30, նիստ ՃԼԶ (136)

Ներկա են նախագահ Ա. Մահակյան, Ս. Մամիկոնյան, Ս. Տիգրանյան, Հ. Դավթյան, Ռ. Տեր-Մինասյան, Ա. Բաբայան, Ա. Երզնկյան, Ս. Ղարաբեկյան, Լ. Թումանյան, Ա. Ստամբոլյան, Ս. Հարությունյան, Ա. Մխիթարյան, կառավարության նախագահ Հ. Քաջազունի, Բաթումի պատվիրակության անդամներ՝ Հ. Թումանյան, գեներ. Բ. Բաղրամով, Երևանի ներկայացուցիչ Մարգարե և Տ. Հովհաննիսյան՝ Բաքվի Ազգային ժողովի նախագահ...

II. Բաթումի պատվիրակության զեկուցումը:

Ս. Հարությունյան զեկուցում է. «Մենք՝ ես, Հ. Թումանյան, գեներ. Բ. Բաղրամով և թարգման Միրզոյան մեկնեցինք և հասանք մեծ դժվարություններով, որովհետև նախօրոք չէր հայտնված նրանց: Բաթումում մեզ լավ ընդունելություն ցույց տվին: Հետևյալ առավոտ մենք տեսնվեցինք Էսադ փաշայի հետ: Ես Խորհրդի անունից ողջունի խոսք ասեցի, հույս հայտնելով, որ մեր բարեկամական հարաբերությունները այսուհետև ավելի կամրապնդվեն: Անցանք գործի: Նախօրոք մենք պատրաստել էինք մի հուշագիր այն հարցերի մասին, որ պիտի կազմեր մեր խոսակցության նյութը, այն է սահմանների, գաղթականության և թուրք գործի կատարած բռնաբարությունների մասին (կարդում է այդ հուշագիրը): Ամեն մի կետը մենք պարզաբանում էինք պարզ ու կտրուկ կերպով, հետո խոսեց Հովհաննես Թումանյան այն բռնությունների մասին, որոնց ինքը ականատես է եղել Լոռվա շրջանում:

Էսադ փաշան պատասխանեց. Ինքը կարգապահության ու արդարության կողմնակից է և իրենից կախված մեջոցները ձեռք կառնի բավարարելու հայերի պահանջները, թեև այդ խնդիրների վերջնական լուծումը տեղի կունենա Պոլսի խորհրդածոդովում: Մեր անկեղծ ցանկությունն է, ասաց նա, որ ձեր տերիտորիան մեծանա, եթե այժմ մեր գործերը գրավել են որոշ տեղեր, այդ եղել է ձեր օգտին, որովհետև գերմանո-վրացական գործերը ուզում են գրավել, մանավանդ որ գեներալ Թ. Նազարբեկյանը համաձայնվել է դրան, թեև ի հաստատություն վերջինիս գրավոր ապացույց տվեց³⁶:

Ես նրան պատասխանեցի, որ գերմանացիք էլ նույնն են ասում մեզ, ավելի լավ է դուք ձեր գործերը հետ քաշեք, մենք մեր գործերով կպահենք մեր սահմանները, եթե չկարողանանք կդիմենք ձեր օգնության՝ իբրև բարեկամ պետության:

Նա ասաց, որ չի հավատում, թե դուք կարողանաք այդ անել: Ախալքալաքի գաղթականության մասին հայտնեց, որ շնորհիվ հայերի զազանությունների (400 մարդ սպանված) [տեղի բնակչության] մտքերը գրգռված են, առայժմ չի երաշխավորում ապահովություն տեղական մահվեղականների վրեժխնդրությունից, ուստի պետք է առժամանակ սպասել: Ինչ վերաբերում է մասնակի

³⁶ «Տվեց» բառն անհրաժեշտ է կարդալ «չտվեց», այլապես նախադասության իմաստը չի հասկացվում:

մարդկանց, թույլատրվում է նրանց գնալ Ալեքսանդրապոլ, Կարս, անձնական գործերով, դրա համար գրություն է տվել Թահսին բեյի³⁷ անունով, որ այդ գործը կազմակերպի: Այն մասին թե Ղարաքլիսում 3 օր կոտորած անելու իրավունք է տրված, համարում է սխալ և ապահովություն է տալիս մարդիկ ուղարկելու քննություն կատարելու համար ոչ միայն Ղարաքլիսի, այլև մյուս վայրերի նկատմամբ:

Այդ հարցերի առթիվ մենք լրացուցիչը հուշագիր ներկայացրինք (կարդում է):

Ղարաքլիսի դեպքը հերքում են: Բաշ Ապարանից իրենք գորքերը իբր թե հետ են քաշել: Ղամարվում հայերն հարձակվել են թուրքական գորքի վրա, 23 ասկյար սպանել և շատերին վիրավորել. այս դեպքերը վրդովեցուցիչ են, բայց չենք ուզում ընդհանրացնել և կիսնդրենք նման դեպքեր այլևս չկրկնվեն:

Մենք պատասխանեցինք որ երկրից կտրված լինելով չենք կարողանում իրազեկ լինել և տեղն ու տեղը մեր ազդեցությամբ խնդիրները լուծել: Դրա համար անհրաժեշտ է, որ ճանապարհները բացվեն, սահմաններից գորքերը քաշվեն, թողնելով, որ սահմանների խնդիրը՝ իբրև ներքին գործ լուծվի մեր հարևանների փոխադարձ համաձայնությամբ:

Երբ դժվարանում էր պատասխան տալ, մենք նրա թույլտվությամբ հեռագիր ուղարկեցինք Պոլիս մեր պատվիրակության, շուտափույթ պատասխան խնդրելով:

Բայց ոչ մի պատասխան չստացանք, խոստացավ պատասխան ստացվելուն պես մեզ ուղարկել: Ապա վերջում հանձն առավ մի կտրուկ շրջաբերական ուղղելու գորքին ու ժողովրդին, որ բարեկամական հարաբերություններ պահեն հայերի հետ, խոստացավ նաև անձամբ շրջագայել նույն նպատակով: Իսկ եթե որևէ բան պատահի, դիմեք ինձ փաստերի ճշգրիտ արձանագրությամբ, իսկ եթե ինձ էլ չհավատաք, ես դյուրություն կտամ քննություն նշանակելու կատարված դեպքերի մասին:

Մեկնելիս մենք շնորհակալական հեռագիր ուղղեցինք նրան (կարդում է այդ հեռագիրը):

Բաքվի վերաբերմամբ նա տվեց մեզ մի գրություն: Խնդրում են ճիշտ կերպով իրագործել դաշնագրի այդ կետը, մանավանդ որ բոլշևիկ գորքերի մեծ մասը հայեր են: Խնդրում են, որ Ազգային Խորհուրդը լրացուցիչ հրահանգ տա գյուղացիներին, որ չդիմադրեն օսմանցոց, ինչպես այդ եղել է Կայսրաշ³⁸ հայ գյուղերում (կարդում է նրանց գրությունը):

Մենք պատասխանեցինք, որ հայ գորքերի բոլշևիկացման մեջ մեղավոր են տեղական թուրքերը, որոնք ճանապարհը փակեցին և թույլ չտվին հայ գորքերին հայրենիք վերադառնալու: Դրանից էլ օգտվեցին բոլշևիկները և ահագին ռոճիկներով կարողացան իրենց ազդեցության տակ զցել: Այնուամենայնիվ, Ազգային Խորհուրդը իր վերջրած պարտականությունը կատարելու է, Գան-

³⁷ Թահսին բեյ – 1914 թ. հոկտեմբերից 1916 թ. փետրվար եղել է Էրզրումի նահանգապետ: «Թուրն էր նրանց միջև դատավորը» խոսքով՝ 1918 թ. հունվարին վերջ դրեց Սիրիայի անկախության շուրջ արաբների հետ վարած բանակցություններին:

³⁸ Այդ անունը կրում էին Արդվիհից 28 կմ արևելք գտնվող և Երևանի նահանգի Նոր Բայազետի գավառում տեղակայված երկու գյուղեր:

ձակում անհաջողության է հանդիպել, բայց նա կշարունակի այն գործը այլ ուղղությամբ (կարողում է գրավոր պատասխանել):

Այսպիսով մեր պատվիրականությանը հաջողվեց.

1) պարզել գաղթականության խնդիրը, նրանց վերաբերմունքը այդ գործին:
2) Իրավունք ստացվեց քննություն կատարելու բռնությունների և կոտորածների վերաբերմամբ: Կիսատ մնաց սահմանների խնդիրը, որ թերևս շուտ լուծում ստանա, եթե Վրաստանի հետ համաձայնության գանք: Բաքվի խնդիրը կարող է շատ լուրջ հետևանքներ ունենալ. պետք է միջոցներ ձեռք առնել այդ ուղղությամբ: Առաջարկում է սրանից բխող բոլոր խնդիրները քննության ենթարկել առաջիկա ժողովում կամ փոքր խորհրդում:

Վերջում հաղորդում է իր տպավորությունները: Նրանք միշտ փաստերով են խոսում, մենք ևս նույնն ենք անելու, եթե ուզում ենք որևէ շոշափելի բան անել: Էսադ փաշան խելոք է և դեպի հայերը լավ տրամադրված է երևում: Ավստրիացի [մի] սպա մեզ հայտնեց, որ Էսադը խելոք, հաստատական և վստահելի մարդ է, նա հակառակ է եղել կառավարության հայաջինջ քաղաքականության, ինչպես և Վեհիբ փաշան և նրանք են փոխել Էնվերի տրամադրությունը դեպի հայերը: Նրա ասելով ավստրիացիք, բոլգարացիք ուզում են, որ Կովկասում կազմվի մի կոալիցիոն խնամակալություն երեք պետությունների վրա, որովհետև հազիվ թե նրանք կարողանան ինքնուրույն գոյությունը պահել: Մի ուրիշ ավստրիացի պատմում էր, որ Տաճկաստանում մեծ դժգոհություն կա պատերազմի դեմ, իբրև դրա հետևանք Պոլսում այրված է 11.000 տուն, ահագին դասալքություն կա ամբողջ երկրում:

Երևանի ներկայացուցիչ Մարգարը հայտնում է, որ իրոք Ղամարլում այդ դեպքը տեղի է ունեցել: Մեր գործամասն այնտեղից հանված է, բայց տեղացիք դիմադրել են թուրքերին, որոնցից սպանված է մինչև 38 ասկյար: Այդ առթիվ ուլտիմատում գրություն ստացվեց, հետևանքը իրեն հայտնի չէ»:

Վերջում Հովհաննես Թումանյանը հայտնում է, որ, ինչպես երևում է, Վեհիբ փաշան շրջաբերական է ուղարկել հայերի հետ լավ վարվելու, լավ կլինի, որ Ազգային Խորհուրդը իր կողմից մի կոչ ուղղի ժողովրդին նման բովանդակությամբ: